



ILIDŽA

INFORMATIVNI BILTEN OPĆINE ILIDŽA

Ilidža • Januar-Februar 2021
• Broj 194



Tarik Stambolić izabran za predsjedavajućeg Općinskog vijeća



Tarik Stambolić vijećnik Naroda i Pravde tajnim glasanjem sa 20 glasova od ukupno 31 vijećnika izabran je za predsjedavajućeg Općinskog vijeća Ilidža na konstituirajućoj sjednici Općinskog vijeća održanoj 30. decembra 2020. Na ovoj sjednici izabrani su i zamjenici predsjedavajućeg. To su Redžo Lemezan iz Naše stranke koji je imao 20 glasova i 19 glasova Samir Avdić iz SDP-a. Tarik Stambolić je na lokalnim izborima koji su održani 15. novembra imao je 2.596 glasova.

Načelnik Općine Ilidža Nermin Muzur čestitao je svim vijećnicima, kao i rukovodstvu Vijeća koji su dobili povjerenje građana i izrazio nadu da će zajedno u naredne četiri godine raditi u interesu svih građana Općine Ilidža

“Ono što je sigurno to je da je ruka načelnika pružena prema svakom vijećniku, za svaki dobar prijedlog, za svaku ideju i inicijativu koja je u interesu građana” izjavio je načelnik Muzur.

Općinsko vijeće Ilidža izabralo je članove u stalnim radnim tijelima Općinskog vijeća na temelju izbornih rezultata postignutih na Općinskim izborima održanim 15. novembra 2020. godine.

Usvojena Odluka o privremenom finansiranju


Općinsko vijeće Ilidža na vanrednoj sjednici održanoj 30. decembra 2020. u Multifunkcionalnoj sali usvojili su Odluku o privremenom finansiranju za period 01.01 – 31.03.2021. godine. Općinsko vijeće Ilidža nije usvojilo Izvještaj o izvršenju Budžeta za period 01.01. - 30.09.2020. godine, kao ni Periodični izvještaj.

Na vanrednoj sjednici usvojena je dopuna Poslovnika o radu Općinskog vijeća Ilidža, kojim je propisana mogućnost da se sjednice općinskog vijeća, kolegij i radna tijela Vijeća mogu održavati elektronskim putem, uz korištenje novih informacijskih tehnologija. Dopuna je donesena zbog činjenice da još uvijek imamo veliki broj oboljelih od virusa COVID-19 i da su još uvijek na snazi Naredbe kriznih štabova.





Održana prva redovna sjednica Općinskog vijeća



Općinsko vijeće Ilidža je na prvoj redovnoj sjednici održanoj online 18. februara 2021. godine utvrdilo Nacrt budžeta Općine Ilidža u iznosu 25.700.000 KM. Za Nacrt glasalo je 20 vijećnika, pet je bilo protiv, a pet suzdržano.

Utvrđeni Nacrt se upućuje na javnu raspravu u periodu od 19 do 28. februara 2021. godine. Prijedlozi, primjedbe, mišljenja i sugestije na Nacrt budžeta mogu se dostaviti u pisanoj formi i to putem Centra za pružanje usluga građanima - Službi za finansije, sa naznakom "Za Nacrt budžeta Općine Ilidža za 2021. godinu" ili putem e-mail-a pomoćniku za finansije - benjamin.mesak@opcina-ilidza.ba, kao i u prostorijama mjesnih zajednica Općine Ilidža. Nacrt budžeta Općine Ilidža za 2021. godinu će biti dostupan na web stranici Općine Ilidža i Facebook stranicama mjesnih zajednica Općine Ilidža.

S obzirom da je prvi put sjednica održana online, zbog tehničkih usklađivanja ista nije bila dostupna za javnost, dok će se za sljedeće sjednice realizirati mogućnost live prenosa.

U toku pripreme Nacrta Budžeta za 2021. godinu omogućeno je građanima da putem mjesnih zajednica i online putem upute svoje prijedloge i sugestije. U cilju potpune transparentnosti i vidljivosti svih rashoda izvršena je rekompozicija budžetskih rashoda i grupisanje istih u programe koji doprinose ostvarenju zadatih ciljeva. Ovakvim klasificiranjem rashoda, njihovi rezultati mogu biti jasno prikazani, što omogućava i mjerenje njihovog napretka. Na taj način zadovoljen je uvjet programskog budžetiranja i vezanja istih za strateške i operativne ciljeve koji će se utvrditi strategijom razvoja. Kao poseban segment budžeta uveden je „kapitalni budžet“ koji je iskazan na trogodišnjem nivou i pruža uvid u višegodišnje finansiranje kapitalnih projekata. Nacrtom budžeta Općine Ilidža su uvedeni sljedeći programi: Program podrške rada parlamentarnih poli-

tičkih stranki i izborne aktivnosti, Programi socijalne potpore, Programi potpore boračkoj populaciji, Program aktivne politike zapošljavanja i razvoja privrede i turizma, Program podrške institucijama i subjektima od interesa za razvoj lokalne zajednice, Program projekata za razvoj kulture, sporta i obrazovanja, Program prostornog planiranja i uređenja građevinskog zemljišta, Program sanacije devastiranog stambenog fonda, Program unapređenja stanja lokalnih cesta, Program uređenja javnih površina i zaštite okoliša, Program izdataka za prirodne i druge nesreće i izgradnja i održavanje skloništa.

Prema ovom Nacrtu, između ostalog, planirana je izgradnja i nastavak izgradnje saobraćajnice Ilidža-Hrasnica, izgradnja i projektovanje sekundarne vododvodne mreže uz učešće građana po MZ, izgradnja i rekonstrukcija kanalizacione mreže uz učešće građana, izgradnje dječijih igrališta i sportskih ploha, Centar za zdravo starenje, rekonstrukcija obdaništa Lužani, izgradnja osnovne škole na području MZ Stup, Budžet za mlade, stambeno zbrinjavanje Roma iz Šumarske škole, izgradnja javne garaže u centru Ilidža i dr.

U odnosu na ranije godine Nacrtom Budžeta za 2021. godinu su uvedene nove budžetske pozicije i to:

1. Transfer za humanitarno - karitativne organizacije - javne kuhinje,
2. Program sufinansiranja zapošljavanja,
3. Podsticaj privrednim subjektima Općine putem regresiranja dijela kamatne stope,
4. Program sufinansiranja samozapošljavanja po javnom pozivu,
5. Sufinansiranje projekata sa međunarodnim organizacijama za unapređenje lokalnog razvoja,
6. Grant za vjerske zajednice - kao vidljiva stavka budžeta,
7. Sufinansiranje izgradnje džamije Stupsko brdo,



8. Podrška stambenom zbrinjavanju mladih putem ostvarivanja prava na subvenciju plaćenog poreza na promet nepokretnosti i pdv-a,

9. Poboljšanje prostornih uslova rada i opremljenosti Memorijalnog Centra Srebrenica-Potočari,

10. Sredstva za eksproprijacija zemljišta (čime je ispunjena obaveza dokazivanja namjenski osiguranih sredstava za ove namjene),

11. Rušenje bespravno izgrađenih objekata,

12. Uklanjanje bespravno postavljenih sadržaja na području Općine Ilidža,

13. Izrada i revizija projektne dokumentacije i saglasnosti za objekte u vlasništvu Općine,

14. Izrada i revizija projektne dokumentacije i saglasnosti za objekte koji nisu vlasništvo Općine,

15. Uređenje major korita,

16. Pješačka zona - Rustempašina i proširenje Male Aleje,

17. Rekonstrukcija KSC Hrasnica,

18. Uspostava Centra za komunalne usluge,

19. Uspostava Registra nekretnina,

20. Vrtić Hrasnica – sufinansiranje vanjskog uređenja i dr.

Takođe, na sjednici su imenovana radna tijela Općinskog vijeća shodno dogovoru parlamentarnih stranaka koje imaju vijećnike u Općinskom vijeću.

Na prijedlog Općinskog načelnika, donesena je i Odluku o stipendiranju talentovanih učenika i studenata u školskoj/akademskoj 2020./2021. godini. Prema ovoj odluci stipendirat će se ukupno 419 učenika i studenata.

Usvojena je i Odluku o stipendiranju učenika i studenata slabijeg imovinskog stanja. Planirano je stipendiranje 80 učenika srednjih škola i 100 studenata visokoškolskih

ustanova, međutim, Vijeće je donijelo odluku da se stipendije dodijele svima koji ispunjavaju uslove i to 179 učenika i 65 studenata.


Općinsko vijeće Ilidža na prvoj redovnoj sjednici donijelo je i Odluku o stipendiranju djece bez oba roditelja i djece bez roditeljskog staranja učenika i studenata u školskoj/akademskoj 2020./2021. godini. Tom odlukom utvrđeni su uslovi za stipendiranje djece bez oba roditelja i djece bez roditeljskog staranja, učenika osnovnih i srednjih škola i redovnih studenata u školskoj/akademskoj 2020./2021. godini. Prema toj odluci stipendirat će se 27 učenika osnovnih škola, 13 učenika srednjih škola i 8 studenata.

Općinsko vijeće usvojilo je i Odluku o raspisivanju javnog poziva za predlaganje kandidata za dodjelu priznanja Općine Ilidža. Prijave na ovaj javni poziv podnositi će se do 26. februara 2021. godine.

Pored navedenog, usvojene su i Odluka o dopuni Odluke o građevinskom zemljištu na području općine Ilidža, kao i Odluka o javnom interesu za rekonstrukciju Igmanke ceste od Glavogodine do Osmica na Igmanu. Nakon usvajanja predmetne odluke stekli su se uvjeti za provođenje postupka eksproprijacije u cilju rješavanja imovinsko-pravnih odnosa.

Usvojen je Program rada Općinskog vijeća Ilidža za 2021. godinu te je data saglasnost Općinskog vijeća na Program rada JP „Ilidža“ d.o.o. za poslovnu 2021. godinu.

Na sjednici nije usvojen Izvještaj o radu JU KSR Hrasnica-Ilidža za period 01.01. - 31.12.2019. godine niti Izvještaj o finansijskom poslovanju JU KSR Hrasnica-Ilidža za period 01.01. - 31.12.2019. godine sa izvještajem Nezavisnog revizora za 2019. godinu.





Počela obnova vrtića Lužani

Načelnik Općine Ilidža Nermin Muzur, ministrica odgoja i obrazovanja Kantona Sarajevo Naida Hota-Muminović i direktorica JU „Djeca Sarajeva“ Suanita Banda, 20. januara ozvaničili su početak radova rekonstrukcije objekta vrtića „Lužani“ koji se nalazi u ulici Karima Zaimovića 4.

„Ovo je jedan od najvažnijih projekata na Ilidži i izuzetno me raduje što je zvanično započeta rekonstrukcija vrtića „Lužani“. Ovaj objekat godinama je u ovakvom stanju te je tek obnovljen dio vrtića 2016.godine za oko 340 kvadratnih metara površine objekta i u funkciji je bio samo za dvije grupe djece što je oko 60 mališana. Kompletnom obnovom objekta povećat će se kapacitet vrtića na ukupno 300 djece, te će biti jedan od vrtića sa najvećim kapacitetom u Kantonu Sarajevo“, istakao je načelnik Muzur.



Prema riječima načelnika Muzura, obnova vrtića „Lužani“ je bitna i sa aspekta sigurnosti građana ove mjesne zajednice s obzirom da je objekat godinama zapušten, te je bio mjesto okupljanja i nedoličnog ponašanja različitih grupa građana.

Ministrica Hota-Muminović podsjetila je opredjeljenje Vlade Kantona Sarajevo za povećanje kapaciteta ustanova za predškolski odgoj.

„Trenutno radimo na objedinjavanju registra svih objekata u Kantonu Sarajevo, koji su u fazi rekonstrukcije, koji čekaju rekonstrukciju i onih koji su u završnoj fazi. Na taj način ćemo imati kompletne podatke i nadam se u pravo vrijeme i po tome postupiti“, izjavila je ministrica Hota-Muminović.

Predstavnica izvođača radova Unigradnje d.d., Fadila Sadiković naglasila je da će pored uređenja unutrašnjosti i vanjskog izgleda objekta, fokus biti i na uređenju dvorišta.

Direktorica JU „Djeca Sarajeva“ Suanita Banda izrazila je zahvalnost načelniku Muzuru i ministrici Hota Muminović koji su pokazali sluh za rekonstrukciju ovog objekta.

„Ovo će biti jedan od vrtića koji će imati najveći kapacitet u Kantonu Sarajevo. U njemu će se moći upisati oko 250 do 300 djece, te je planirana uspostava tri jasličke grupe, a ostalo će biti djeca od tri do šest godina. Takođe, u ovom objektu bit će napravljena i centralna kuhinja gdje će se spremati svježa hrana za vrtić „Lužani“ ali i za druge naše objekte. Otvaranjem ovog objekta znatno će se smanjiti liste čekanja“, istakla je direktorica Banda.

Dio objekta koji će se rekonstruisati obuhvatit će 10 grupnih soba za sve uzraste djece i glavnu kuhinju. Zajedno sa postojećim dijelom, ukupno će imati 12 grupnih soba, što znači da će biti vrtić sa jednim od najvećih kapaciteta u Kantonu Sarajevo. Projekat rekonstrukcije je vrijedan 1.041.300 KM.



Ozvaničen početak radova Sarajevske zaobilaznice

Načelnik Općine Ilidža Nermin Muzur, direktor JP „Autoceste Federacije BiH“ Adnan Terzić i direktor izvođača radova firme „Euro-Asfalt“, Hamed Ramić, 13. januara ozvaničili su početak izgradnje posljednjeg dijela Sarajevske obilaznice, poddionica LOT-3B dužine 1,44 kilometra, kao sastavnog dijela koridora 5C. Izgradnjom ove saobraćajnice, omogućit će se bolja saobraćajna povezanost autoceste na Koridoru 5C sa mrežom saobraćajnica nižeg ranga, magistralnim i lokalnim cestama. Vrijednost ovog ugovora je 23.283.000 KM sa PDV-om.

„Drago mi je da počinje ovakav projekat koji je izuzetno važan za stanovništvo, prvenstveno MZ Blažuj. Znamo da su imali ogromne probleme posebno kad je u pitanju industrijska zona i da su ljudi morali koristiti zaobilaznice i lokalne puteve, po čak kilometar i dva duže nego što treba. Sa završetkom radova bit će izuzetno olakšan pristup posebno putnicima koji dolaze iz pravca Kiseljaka i iz drugih općina, prema mostarskom raskršću. Općina Ilidža je provela postupak eksproprijacije oko 60.000 m² zemljišta, nekoliko desetina stambenih i poslovnih objekata“, izjavio je načelnik Nermin Muzur.

Saobraćajnica je gradski put sa dvije saobraćajne trake (vozna i preticajna) za svaki smjer kretanja i predstavlja spoj petlje Vlakovo sa petljom na Mostarskom raskršću na magistralnu cestu M-17/M-5. Na ovoj poddionici gradit će se dva vijadukta, kao i rekonstrukcija servisnih saobraćajnica, što će biti od velikog značaja za lokalno stanovništvo. U sklopu projekta izvršena je i rekonstrukcija postojeće saobraćajnice Mostarsko raskršće - groblje Vlakovo.

Direktor „Euro-Asfalta“ Hamed Ramić rekao je kako će duž cijele trase biti urađeno sve kako bi se lokalnom stanovništvu omogućio neometan život. Rok izgradnje je 14 mjeseci od dana uvođenja izvođača u posao.

„Konačno smo odabrali izvođača, potpisali ugovor i očekujem da ne bismo trebali imati problema kad su u pitanju rokovi i kvalitet“, kazao je Adnan Terzić, direktor Autoceste FBiH.



Sigurnost građana na prvom mjestu

Federalni ministar unutarnjih poslova Aljoša Čampara i sarajevski policijski komesar Nusret Selimović 31. decembra 2020. posjetili su Općinu Ilidžu.

Sa načelnikom Općine Nerminom Muzurom razgovarano je o sigurnosti građana Ilidže, s posebnim aspektom na migrantsku krizu.

Općina Ilidža stavila je na raspolaganje sve resurse i kapacitete, kako bi nadležna policijska tijela učinili sve da se građani osjećaju sigurnije.

Načelnik Nermin Muzur inicirao je i sastanak sa ministrom sigurnosti BiH Selmom Cikotićem koji će biti održan početkom naredne godine, kako bi se aktuelni problemi efikasnije i brže rješavali, sve u cilju stabilizacije situacije i zaštite građana naše općine.

Saradnja Općine, Ministarstva unutrašnjih poslova i Uprave policije

Načelnik Općine Ilidža Nermin Muzur 2. februara 2021. održao je sastanak sa ministrom unutrašnjih poslova Kantona Sarajevo Admirom Katicom i komesarom Uprave policije MUP-a Kantona Sarajevo Nusretom Selimovićem.



Saradnja sa višim nivoima vlasti

Načelnik Muzur obavio je sastanke sa predstavnicima viših nivoa vlasti sa ciljem uspostavljanja buduće saradnje i realizacije zajedničkih projekata radi unapređenja i razvoja ove lokalne zajednice.

Načelnik je sa ministrom saobraćaja Kantona Sarajevo Adnanom Štetom razgovarao o koracima i projektima koji bi trebali započeti sa realizacijom u narednom periodu. Jedna od tema razgovora svakako je bila izgradnja tramvajske pruge Ilidža - Hrasnica te je dogovoreno da će se u narednom periodu održati radni sastanak na kojem će biti dogovorena konkretna saradnja i buduće aktivnosti za početak realizacije ovog vrlo važnog projekta ali i drugih projekata u saradnji Općine i Vlade Kantona Sarajevo.



Koordinacija i saradnja sa svim nivoima vlasti izuzetno je bitna za razvoj lokalne zajednice, zaključeno je na sastanku načelnika Muzura i zastupnika u Skupštini Kantona Sarajevo sa područja općine Ilidža. Sastanku su prisustvovali zastupnica Arijana Memić te zastupnici Dževad Poturak, Zvonko Marić, Mirza Čelik i Elvis Vreto.

Dogovorena je saradnja, podrška i djelovanje zastupnice i zastupnika u budućim aktivnostima Općine Ilidža sa ciljem unapređenja uslova života građana općine Ilidža.

Na održanom sastanku dogovorena je saradnja Ministarstva unutrašnjih poslova Kantona Sarajevo i Uprave policije sa Općinom Ilidža, prvenstveno u unapređenju sigurnosnog aspekta zbog problema sa kojima se susreće ova lokalna zajednica pojavom migrantske krize. Načelnik Muzur je istakao da se na lokalitetu općine Ilidža trenutno kreće i boravi najveći registrovani broj migranata u Bosni i Hercegovini, te je zbog toga izuzetno važna zajednička radna posjeta migrantskom kampu „Blažuj“, koja je prethodno najavljena i dogovorena sa ministrom sigurnosti Bosne i Hercegovine Selmom Cikotićem.

Načelnik Muzur upoznao je ministra Katicu i komesara Selimovića i o održanom sastanku sa komandirima Pete policijske uprave Ilidža, te o problemima sa kojima se susreću zbog podkapacitiranosti i nedovoljne opremljenosti ali i o spremnosti Općine da pruži podršku radu policije.

Ministar Katica i komesar Selimović su istakli da će pri likom planiranja budućih aktivnosti, u skladu sa mogućnostima i kapacitetima, pristupiti traženju najboljih mehanizama za rješavanje i unapređenje rada ove policijske uprave.



Održan radni sastanak o Migrantskom centru Blažuj

Načelnik Općine Ilidža Nermin Muzur 5. februara 2021. je zajedno sa ministrom sigurnosti Bosne i Hercegovine Selmom Cikotićem, ministrom unutrašnjih poslova KS Admirom Katicom i ministricom za rad, socijalnu politiku, raseljena lica i izbjeglice KS Ivanom Prvulović, direktorom Službe za poslove sa strancima Slobodanom Ujićem, šeficom misije Međunarodne organizacije za migracije u BiH Laurom Lungarotti, šefom kooperacija u Delegaciji EU u BiH Richardom Maša te predstavnicima austrijske vlade kao i sa predstavnicima Uprave policije KS, obišli Migrantski centar Blažuj u sklopu radnog sastanka.

Nakon posjete Migrantskom centru, sastanak je održan u prostorijama Općine Ilidža. Tema sastanka je rješavanje prioriteta problema u samom Migrantskom centru Blažuj, kako bi se povećao aspekt sigurnosti korisnika ovog kampa, ali i građana Općine Ilidža, koji nose najveći teret od pojave migrantske krize u Boni i Hercegovini.

„Zahvaljujemo se ministru Cikotiću, IOM-u, predstavnicima Evropske unije, Službi za poslove sa strancima, i svakako ministru Katici i ministrici Prvulović kao i predstavnicima Uprave policije Kantona Sarajevo na dolasku i spremnosti za zajedničku saradnju u rješavanju problema sa kojima se susreće općina Ilidža kada je riječ o migrantskoj krizi ali i o samom Migrantskom centru Blažuj koji je smješten u ovoj lokalnoj zajednici. Najveći teret migrantske krize u Bosni i Hercegovini snosi Općina Ilidža, s obzirom da je na ovom području najveći registrovani broj migranata u Bosni i Hercegovini. Susrećemo se sa mnogo problema i najveći priroet jeste sigurnost naših građana. Želimo da konkretnim rješenjima i zajedničkom saradnjom sa svim nivoima vlasti i institucijama pronademo najefikasnija rješenja i mehanizme kako bi riješili probleme sa kojima se susrećemo. Svjesni smo da ne možemo zaustaviti migrantsku krizu, ali želimo da uspostavimo kontrolu nad situacijom u kojoj se nalazimo“, izjavio je načelnik Muzur.

Ministar Cikotić je izrazio zahvalnost i spremnost Općine Ilidža za saradnju i cilj je pronalaženje mehanizama za unapređenje ne samo sa humanitarnog aspekta koji se odnosi na sami kamp, već prioritarno unapređenje sigurnosnog aspekta građana općine Ilidža.

„Zahvaljujemo se Općini i Kantonu na saradnji jer je zasigurno općina Ilidža preuzela najveći teret od pojave migrantske krize. Od ukupno 6000 registrovanih migranata u BiH, oko 3000 ih je smješteno u kampu Blažuj. To je veliko opterećenje samog kampa i sigurno možemo obećati da povećanja broja migranata neće biti, a da ćemo kontinuirano raditi na tome da smanjimo trenutni broj korisnika u kampu. Izuzetno je bitna saradnja svih nivoa vlasti i svih institucija i međunarodnih organizacija tako da ćemo zajedno pronaći najefikasnije mehanizme u rješavanju problema u ovom



kampu. Upravo zbog prethodno navedenog, izuzetno nam je drago što smo na inicijativu Općine Ilidža održali sastanak u ovom sastavu i što ćemo donijeti konkretne zaključke i plan djelovanja,“ istakao je ministar Cikotić.

Šefica misije Međunarodne organizacije za migracije u BiH Laura Lungarotti i šef kooperacija u Delegaciji EU u BiH Richardom Masa, iskazali su spremnost da IOM i Evropska unija pruže podršku u skladu sa potrebama i zaključcima sastanka te da će kontinuirano pružati podršku Općini Ilidža u prevazilaženju trenutne situacije.

Na sastanku je dogovoreno da će prioriteti u narednom periodu biti uređenje kampa, odnosno unapređenje, popravka i održavanje zaštitne ograde, takođe unapređenje javne rasvjete oko kampa, prilazni put, kao i postavljanje video nadzora u Migrantskom centru Blažuj, ali i u općini Ilidža radi bolje kontrole i obezbjeđenja većeg stepena sigurnosti građana Općine Ilidža.

Na sastanku je dogovoreno da će već naredne sedmice biti izrađen detaljan plan djelovanja, kako bi se u što kraćem vremenu krenulo u realizaciju dogovorenih zaključaka.





Općina Ilidža dio projekta Britanske ambasade - „Pilotiranje mehanizama transparentnosti i integriteta organa vlasti na kantonalnom i lokalnom nivou”

Načelnik Općine Ilidža Nermin Muzur, zajedno sa saradnicima, održao je sastanak sa predstavnicom Britanske ambasade Sabinom Đapo te predstavnicima firme Lucid Linx iz Sarajeva, Ninom Karađinović i Nerminom Kadribašićem.

Tema sastanka je projekat „Pilotiranje mehanizama transparentnosti i integriteta organa vlasti na kantonalnom i lokalnom nivou u BiH“ koji se finansira iz Britanskog fonda za dobro upravljanje (UK Good Governance Fund), a implementiraju ga firme Tetra Tech iz Velike Britanije i Lucid Linx iz Sarajeva.

Ovaj projekat je nastavak inicijativa Ujedinjenog Kraljevstva za jačanje borbe protiv korupcije u Bosni i Hercegovini te unapređenja pružanja usluga građanima. Vlasnik projekta je Britanska ambasada u Sarajevu.

„Britanska ambasada uvidjela je izuzetno veliki značaj općinskog nivoa i odgovornosti općina te je proteklom periodu pažljivo pripremala ovaj projekat. Vrlo pažljivom primjenom seta kriterija izabrane su potencijalne pilot općine i izuzetno nas raduje što je Općina Ilidža pristala da bude dio ovog projekta te se ovim putem zahvaljujem načelniku Muzuru na susretljivosti“, istakla je Nina Karađinović.

Takođe, Karađinović je istakla da se ovaj projekat odnosi na pilotiranje izrade jednog paketa mjera transparentnosti i integriteta koji bi obuhvatao set standarda za postupanje u procesima javnog zapošljavanja, javnih nabavki, dodjele javnih sredstava građanima, udruženjima i privredi, dodjeli dozvola i dr., uz dodatne standarde koji se tiču sprečavanja sukoba interesa te prijavljivanja nepravilnosti.

„Općina Ilidža je uvijek spremna da učestvuje u projektima koji su od izuzetnog značaja za naše društvo, pogotovo što želimo da građanima na što transparentniji način predstavimo rad Općine i time opravdamo povjerenje koje su nam dali. Mi



smo već ranije započeli određene procese u saradnji sa Uredom za borbu protiv korupcije i upravljanja kvalitetom Kantona Sarajevo u vidu transparentnosti i jačanja borbe protiv korupcije te nas izuzetno raduje što smo izabrani i što ćemo biti dio i projekta Britanske ambasade“, istakao je načelnik Muzur.

Krajnji cilj ove inicijative u jedinicama lokalne samouprave će biti „knjiga standarda“ koja će biti brendirana i predstavljena građanima te će na taj način biti vidljivo da je integritet i transparentnost na visokom mjestu među prioritetima Općine Ilidža.

Na sastanku se razgovaralo i o drugim projektima koje realizira Britanska ambasada, te je projekt menadžerica Sabina Đapo informisala načelnika Muzura o aktivnostima koje će se provoditi u narednom periodu kao i o načinima i projektima za nastavak saradnje Britanske ambasade i Općine Ilidža.

Općina Ilidža prva općina koja će biti integrisana u jedinstveni sistem borbe protiv korupcije u Kantonu Sarajevo

Načelnik Općine Ilidža Nermin Muzur 15. januara održao je sastanak sa predstavnicima Ureda za borbu protiv korupcije i upravljanje kvalitetom Kantona Sarajevo. Sastanku su prisustvovali šef Ureda Erduan Kafedžić i savjetnica Adisa Avdić.

Načelnik Muzur je istakao spremnost Općine Ilidža za saradnju, sistemsko uspostavljanje i poduzimanje aktivnosti koje će biti usmjerene na prevenciju i borbu protiv korupcije te povećanje transparentnosti u radu Općine Ilidža.

Šef Ureda Erduan Kafedžić istakao je aktivnosti koje je do sada Ured za borbu protiv korupcije i upravljanje kvaliteta implementirao na nivou Kantona Sarajevo, konkretno koje se odnose na uspostavljanje Registra imenovanih lica u Kantonu Sarajevo, Registra zaposlenih u javnom sektoru Kantona Sarajevo i Registra podataka o javnim nabavkama koje provode institucije čiji je osnivač Kanton Sarajevo.

Takođe, upoznao je načelnika Muzura o narednim aktivnostima Ureda koje podrazumijevaju poseban program za lokalne zajednice odnosno uključanje općina u ranije pomenute registre čime bi se unaprijedio okvir borbe protiv korupcije u Kantonu Sarajevo.

Načelnik Muzur je naveo da su, na poziv Ureda, već poduzete aktivnosti na izradi i donošenju relevantnih

akata/odluka kojim bi se Općina Ilidža kao prva općina u Kantonu Sarajevo uključila u navedene registre.

„Općina Ilidža izražava spremnost na punu saradnju sa Uredom za borbu protiv korupcije i upravljanje kvalitetom Kantona Sarajevo, sa ciljem uspostavljanja okvira borbe protiv korupcije. Veliki značaj predstavljaju sistemski rješenja koja će omogućiti veću transparentnost u radu, a samim tim vratiti povjerenje građana u javne institucije. Lokalne samouprave imaju itekako veliku ulogu u koordinaciji i borbi protiv korupcije“, istakao je načelnik Muzur.

Na sastanku su dogovorene naredne aktivnosti u saradnji Općine Ilidža i Ureda za borbu protiv korupcije i upravljanje kvalitetom Kantona Sarajevo koje će se ozvaničiti potpisivanjem Memoranduma o saradnji.





Posjeta gradonačelnika Goražda Općini Ilidža



U posjeti Općini Ilidža i načelniku Muzuru 16. februara 2021. bili su gradonačelnik Goražda Ernest Imamović, zamjenik predsjedavajućeg Gradskog vijeća Goražde Nezim Alagić i vijećnik Amar Imamović.

Načelnik Muzur informisao je gradonačelnika Imamovića i predstavnike Gradskog vijeća Goražde o planiranim aktivnostima na području Općine Ilidža u narednom periodu, te im se zahvalio na posjeti ovoj lokalnoj zajednici.

„Općina Ilidža je prva općina u Kantonu Sarajevo koju smo posjetili i zahvaljujemo se načelniku Muzuru na srdačnoj dobrodošlici te mu želimo puno uspjeha u daljem radu,“ kazao je gradonačelnik Imamović.

Takođe, dogovoren je okvirni plan za realizaciju zajedničkih projekata i saradnje Općine Ilidža i Grada Goražde, koja će se u narednom periodu ozvaničiti potpisivanjem protokola o saradnji.

Započete posjete privrednim subjektima

Načelnik Nermin Muzur započeo je sa posjetama privrednim subjektima sa sjedištem na području općine Ilidža, te se u narednom periodu planira unaprijediti saradnja sa realnim sektorom koji je jedan od ključnih nosilaca ekonomskog razvoja općine Ilidža.

Prva posjeta je upriličena jednoj od najvećih ilidžanskih kompanija „Sinkro“ koja se bavi proizvodnjom, veleprodajom i maloprodajom tapaciranog i pločastog namještaja, repromaterijala i štofova. Ova kompanija trenutno zapošljava više od 500 zaposlenih, sa proizvodnim pogonima na više od 40.000 kvadrata. Načelnik Muzur je sa vlasnikom ove kompanije Omarom Kuštrićem razgovarao o kapacitetima i poziciji ove kompanije na svjetskom i domaćem tržištu, ali i o izazovima u radu zbog pojave pandemije.

„Zadovoljstvo mi je što na području općine Ilidža imamo kompanije koje u potpunosti realiziraju proizvodnju, od sirovine do finalnog

proizvoda i to po najvećim evropskim standardima. Ovakvi primjeri nam pokazuju da je moguće imati vrhunski organizirane pogone i sisteme kojima je potrebno pružiti podršku u njihovom radu“, istakao je načelnik Muzur.

U narednom periodu načelnik Muzur će nastaviti sa posjetama privrednim subjektima te će organizirati sastanke sa ciljem pružanja podrške realnom sektoru i unapređenja zajedničke saradnje.





Načelnik Općine Ilidža Nermin Muzur, ministar Adnan Šteta i direktor Selmir Kovač obišli radove u Hrasničkoj cesti

Načelnik Općine Ilidža Nermin Muzur, ministar saobraćaja Kantona Sarajevo Adnan Šteta, direktor Direkcije za ceste Kantona Sarajevo Selmir Kovač i direktor Demus d.o.o Dino Smajlović, 23. Februara, obišli su radove u ulici Hrasnička cesta od M-17 do kružnog toka kod Internacionalnog univerziteta u Sarajevu.

Ovo je zajednički projekat Općine Ilidža i Ministarstva saobraćaja, odnosno Direkcije za ceste.

Na ovoj dionici do sada je urađeno 560 metara asfalta i obostrane pješačke staze te će se radovi nastaviti u dužini od 400 metara, od raskrsnica ulica Hrasnička cesta-Banjska do Hotela Terme. Nakon završetka ove dionice pristupit će se posljednjoj fazi rekonstrukcije Hrasničke ceste, a kompletni radovi će biti završeni za tri mjeseca.

Načelnik Muzur je istakao da će u narednom period biti realizirani i drugi projekti, te je cilj kontinuirano ulaganje i obnova infrastrukture na općini Ilidža.

Održan sastanak s direktorima osnovnih škola

Načelnik Muzur 26. februara 2021. održao je sastanak sa direktorima osnovnih škola sa područja općine Ilidža.

Direktori su iznijeli probleme i izazove sa kojima se susreću u radu, ali i potrebe za unapređenje nastavnog procesa i uslova učenika općine Ilidža.

Načelnik Muzur istakao je da, iako Općina Ilidža ima ograničene nadležnosti u oblasti obrazovanja, pružit će punu podršku i saradnju u poboljšanju uslova za rad osnovnih škola.

„Naša je obaveza da omogućimo našoj djeci što kvalitetnije uslove za formalno ali i neformalno obrazovanje. U narednom periodu zasigurno ćemo pronaći najefikasnije mehanizme za rješavanje potreba i problema sa kojima se susreću naše škole i učenici, jer je neophodno i prioritet da im obezbijedimo sigurno okruženje i sve što im je potrebno za razvoj njihovog znanja, vještina i budućnosti. To su naše škole i naša djeca i oni će uvijek biti prioritet u našem radu“, kazao je načelnik Muzur.

Takođe, na sastanku je istaknuto da će Općina Ilidža u Budžetu za 2021.godinu planirati sredstva za poboljšanje infrastrukture, izgradnju dječijih i sportskih igrališta, Školu plivanja učenika, užine za djecu, stipendiranja, socijalne naknade, lige mladih u sportovima kao i mnoge druge aktivnosti koje za cilj imaju stvaranje što ljepšeg i boljeg okruženja za našu djecu.

Dogovorena saradnja Općine Ilidža i Ministarstva saobraćaja Kantona Sarajevo

Načelnik Općine Ilidža Nermin Muzur zajedno sa saradnicima održao je 5. februara 2021. sastanak sa ministrom saobraćaja KS Adnanom Šetom, njegovim pomoćnikom Emirom Hota i direktorom Direkcije za puteve Selmirom Kovačem. Tema sastanka bila je saradnja Općine Ilidža i Ministarstva saobraćaja Kantona Sarajevo u narednom periodu.

„Izuzetno nam je bitna podrška Vlade Kantona Sarajeva u realizaciji i nastavku započetih projekata na području općine Ilidža, ali i podrška novim projektima koje planiramo realizirati u narednom periodu. Želimo se zahvaliti ministru Šeti na dolasku i na dogovorenoj saradnji“, istakao je načelnik Muzur.

Ministar Šteta kazao je da je Ministarstvo za saobraćaj Kantona Sarajevo planiralo sredstva za izgradnju tramvajske pruge Ilidža - Hrasnica u Budžetu Kantona Sarajevo za 2021. godinu, te da su već poduzeti prvi koraci u realizaciji ovog projekta. Ističe da je ovo izuzetno važan projekat ne samo za općinu Ilidža već za Kanton Sarajevo.

Na sastanku je dogovoren nastavak započetih aktivnosti ali i novi projekti koji će biti planirani i realizirani uz podršku Ministarstva saobraćaja Kantona Sarajevo na području općine Ilidža sa ciljem unapređenja kvalitete života građana.





Uskoro digitalizacija kulturnog naslijeđa

Predsjedavajući Općinskog vijeća Ilidža Tarik Stambolić i zamjenici predsjedavajućeg Redžo Lemezan i Samir Avdić održali su sastanak 19. januara 2021. godine sa profesoricom Selmom Rizvić i asistenticom Ivonom Ivković iz Udruženja za digitalizaciju i informatizaciju kulturne baštine u BiH - DIGI.BA.

Na sastanku, rukovodstvu Vijeća, prezentovan je projekat Roman heritage in the Balkans i Rimsko naslijeđe Sarajeva, koji između ostalog, obuhvataju i virtualnu šetnju kroz nacionalni spomenik Rimske iskopine na Ilidži kod Sarajeva, edukativni kviz, te aplikaciju za mobilni uređaj putem koje se zainteresovani mogu upoznati sa pretpostavljenim izgledom antičke vile i termalne banje.

Predstavnici Udruženja podsjetili su i na jedan od svojih prvih projekata iz oblasti digitalizacije kulturnog naslijeđa, a kojim je promovisan nacionalni spomenik Arheološko područje - prahistorijsko naselje u Butmiru. Kada je u pitanju kulturno naslijeđe važno je naglasiti da se na području općine Ilidža nalazi čak 11 nacionalnih spomenika Bosne i Hercegovine, a iz rukovodstva vijeća su istakli nezadovoljstvo stepenom njihove zaštite i promocije.

Sa predstavnicama Udruženja dogovorena je buduća saradnja kao doprinos razvoju i promociji kulturnog turizma



na Ilidži kroz kreiranje i prezentaciju digitalne kulturne baštine. U narednom periodu planirano je postavljanje spomenutih sadržaja na zvaničnu web stranicu Općine, uređenje i obilježavanje spomenutih spomenika i postavljanje QR kodova za pokretanje digitalnih promotivnih aplikacija. Udruženje DIGI.BA čine vrhunski eksperti iz oblasti računarske grafičke informatike, kulture, kulturnog menadžmenta, kulturnog turizma i marketinga, koji iz sebe imaju niz uspješno realizovanih projekata u polju digitalizacije i vizuelizacije kulturne građe.

Rukovodstvo Općinskog vijeća u posjeti Centru za zdravo starenje

U sklopu posjeta ustanovama čiji se rad sufinansira iz sredstava budžeta Općine Ilidža, rukovodstvo Općinskog vijeća 29. januara 2021. posjetilo je Centar za zdravo starenje u Hrasnici.

Predsjedavajući Općinskog vijeća Tarik Stambolić i dopredsjedavajući Redžo Lemezan i Samir Avdić, upoznali su korisnike i uposlenike Centra, ali i najznačajnije programske sadržaje koji se realiziraju u ovom Centru.

Kako su istakli korisnici, početak treće životne dobi jedno je od veoma zahtjevnih razdoblja u životu, u kojem su pojedinci uglavnom penzionisani i sami, te upravo iz tog razloga, izuzetno je bitna socijalizacija, edukacija i zabava koju upravo imaju na raspolaganju u ovom Centru.

Rukovodstvo Općinskog vijeća izrazilo je zadovoljstvo što postoji mjesto na kojem će najstariji sugrađani provoditi vrijeme u druženju, zabavi, rekreaciji i sticanju novih znanja. Kako su istakli, zajednička opredjeljenost jeste, formiranje novih centara za zdravo starenje i u drugim ilidžanskim naseljima na osnovu pozitivnih iskustava hrasničkog centra. Hrasničani treće životne dobi iznijeli su i druge ključne probleme s



kojim se svakodnevno susreću te su istakli da je od velikog značaja namjera načelnika Općine Ilidža Nermina Muzura i nove većine u Općinskom vijeću, upravo uključivanje što većeg broj građana Ilidže u aktuelne procese odlučivanja, te će se započeta praksa proaktivnog komuniciranja nastaviti i u narednom periodu.



Podrška Memorijalnom centru Potočari

Načelnik Muzur ugostio je 8. februara 2021. direktora Memorijalnog centra Srebrenica - Potočari, Emira Suljagića.

Tema sastanka je podrška Općine Ilidža radu Memorijalnog centra i njegovoj misiji kao mjestu sjećanja na žrtve genocida u Srebrenici, ali i mjestu čuvanja istine i istraživanja zločina genocida.

„Važno je ukazati na značaj kulture sjećanja i kulture pamćenja. Dužni smo odati počast žrtvama i u obavezi podići svijest o činjenicama vezanim za genocid kako se nikada nikome više ne bi ponovila Srebrenica. Općina Ilidža će pružiti punu podršku radu Memorijalnog centra u njegovoj misiji,“ istakao je načelnik Muzur.

Direktor Suljagić upoznao je načelnika Muzura o aktivnostima koje je Memorijalni centar proveo u proteklom periodu kao što su izgradnja novog arhiva, obnova biblioteke, istraživački projekti od kojih su najvažniji projekti usmene historije sa stotinama preživjelih, te je najavio da će u 2021. godini započeti obnova Upravne zgrade kompleksa Memorijalnog centra.

Takođe, načelnik Muzur informisao je direktora Suljagića da će Općina Ilidža u Budžetu za 2021. godinu planirati finansijska sredstva za podršku radu Memorijalnog centra Srebrenica - Potočari.



Načelnik Muzur: Općina Ilidža će biti prijateljska općina za mlade

Načelnik Muzur održao je sastanak sa predstavnicima Instituta za razvoj mladih KULT. Sastanku su prisustvovali generalni direktor Jasmin Bešić i izvršna direktorica Šeherzada Halimić.

Jasmin Bešić je istakao da je Institut za razvoj mladih KULT do sada sarađivao sa 90% općina u Bosni i Hercegovini i da većina smatra da je saradnja bila uspješna i korisna za bolji položaj mladih u njihovoj lokalnoj zajednici. Takođe, općina Ilidža ima posebno mjesto u njihovoj organizaciji, s obzirom da je Institut u ovoj općini počeo sa djelovanjem i ima svoje sjedište.

„Mladi će sigurno biti jedan od prioriteta u radu Općine Ilidže. Odlučni smo da kroz mjere koje budemo definisali i donosili, posebne pogodnosti imaju mladi. Svjesni smo koliko je značaj mladih ne samo za lokalnu zajednicu već i za društvo, jer oni jesu i trebaju biti nosioci inicijativa i promjena, a mi smo tu da im nudimo prilike. Želimo da Općina Ilidža bude prijateljska općina za mlade i na tome ćemo raditi u narednom periodu“, istakao je načelnik Muzur. Pored redovne saradnje dogovorene su oblasti i teme na kojima će Općina i Institut za razvoj mladih Kult zajedno djelovati za dobrobit i poboljšanje kvalitete života mladih Ilidže.

Saradnja Općine i Pete policijske uprave

Načelnik Muzur i dopredsjedavajući Općinskog vijeća Općine Ilidža, Redžo Lemezan, razgovarali su 26. januara sa komandircom Pete policijske uprave, Ilhanom Šabićem o sigurnosnoj situaciji na području ove lokalne zajednice.

Na sastanku je dogovoreno da će se zajedničkim djelovanjem Općine i policije, uz saradnju građana, pristupiti rješavanju problema u ovoj lokalnoj zajednici.

Opredjeljenje Općine Ilidža jeste i bit će pružanje pomoći i podrške radu policije, a sve sa ciljem povećanja stepena sigurnosti u općini Ilidža.





Posjeta zastupnika Naroda i Pravde



Predsjedavajući Skupštine Kantona Sarajevo Elvedin Okerić, zastupnik u Skupštini Kantona Sarajevo i zastupnik u Domu naroda FBiH Elmedin Konaković zajedno sa političkim direktorom Naroda i Pravde Kemalom Ademovićem boravili su u radnoj posjeti Općini Ilidža. Sastanku je prisustvovao i predsjedavajući Općinskog vijeća Tarik Stambolić.

Načelnik Nermin Muzur upoznao ih je sa razvojnim planovima i potencijalima ove općine, te o narednim aktivnostima i projektima koji se tiču unaprijeđenja lokalne zajednice i infrastrukture. Tokom sastanaka se takođe razgovaralo o projektima i aktivnostima kojima je za realizaciju potrebna podrška Kantona Sarajevo ali i potreba za donošenjem efikasnijih zakonskih okvira i rješenja.

Uručena donacija Doma zdravlja Ilidža

Načelnik Općine Ilidža Nermin Muzur, zbog iskazane potrebe Doma zdravlja Ilidža, 03. februara 2021. Uručio je donaciju određene količine dezinfekcionih sredstava kao podršku radu ove ustanove.

„Ljekari i medicinsko osoblje su podnijeli najveći teret od pojave pandemije i bili su na prvom frontu borbe protiv koronavirusa. Dezinfekciona sredstva koja smo uručili danas Domu zdravlja Ilidža simbolična su donacija, ali se nadamo da će pomoći ovoj ustanovi u njihovom radu. Svi želimo da se pandemija što prije završi, a Općina će i dalje nastaviti pomagati ustanove koje su u funkciji čuvanja zdravlja građana,“ izjavio je načelnik Muzur. Direktorica Doma zdravlja Ilidža, Džana Šaćić, zahvalila je Općini Ilidža na kontinuiranoj podršci ovoj ustanovi, kazavši da Općina Ilidža kroz zajedničku saradnju i podršku jeste jedan od veoma bitnih partnera u poduzimanju aktivnosti na suzbijanju COVID-19.

„Još jednom apelujemo na građane da se pridržavaju svih propisanih mjera kako bi zaštitili sebe i svoje najdraže, te kako bi svi zajedno zaustavili širenje virusa,“ izjavio je načelnik Muzur.



Posjeta ministra kulture i sporta Samira Avdića

Načelnika Nermina Muzura 11. februara 2021. godine posjetio je Samir Avdić, ministar kulture i sporta Kantona Sarajevo.

Razgovaralo se o planiranim aktivnostima u tekućoj godini ali i o mogućnostima podrške Ministarstva razvoju i unapređenju oblasti kulture i sporta u ovoj lokalnoj zajednici.

Načelnik Muzur je informisao Ministra da na području općine Ilidža djeluju mnogi kulturni i sportski kolektivi, koji ostvaruju izvanredne rezultate u svome radu. Takođe, istakao je da Općina planira unaprijediti dosadašnju podršku kulturnim i sportskim klubovima sa područja općine Ilidža, te da je potrebno djelovati i po pitanju obnove i adaptacije postojećih kulturno-sportskih centara i ustanova na ovoj općini.

U sklopu posjete, načelnik Muzur i ministar Avdić obišli su neke od kulturno-sportskih centara na Ilidži - Dom kulture u Hrasnici i Sportski centar Hrasnica.

Ministar Avdić iskazao je spremnost Ministarstva kulture i sporta da pruži podršku unapređenju ovih oblasti na općini Ilidža te su dogovoreni konkretni projekti za saradnju u narednom periodu.





Predstavnici Slovačkog LOT EUFOR tima u posjeti Općini

Načelniku Općine Ilidža, Nerminu Muzuru 8. februara 2021. u posjeti su bili predstavnici Slovačkog LOT EUFOR tima stacioniranog u Sarajevu, kako bi mu čestitali i poželjeli uspješan rad na novoizabranoj funkciji.

Načelnik Muzur zahvalio se predstavnicima LOT tima na posjeti i čestitkama, te ih je informisao o planiranim aktivnostima u narednom periodu sa ciljem unaprijeđenja razvoja Općine Ilidža.

Takođe, razgovaralo se o mogućoj saradnji, te su predstavnici LOT tima izrazili svoje zadovoljstvo srdačnom dobrodošlicom i iskazali su svoju spremnost za pružanje podrške ovoj lokalnoj zajednici.

Slovačka profesionalna vojska predstavlja EUFOR u Sarajevu od 2011. godine te kontinuirano sarađuje sa svim nivoima vlasti, od lokalnih zajednica pa do državnih predstavnika i institucija.

Uskoro 50 kontejnera za otpad

Općina Ilidža jedna je od četiri lokalne zajednice u BiH izabrane u okviru projekta „Upravljanje staklenom ambalažom na Zapadnom Balkanu“ koju provodi kompanija Ekopak u saradnji sa KJKP „Park“ i Njemačkom organizacijom za međunarodnu saradnju - GIZ.

Kako je predviđeno projektom, na teritoriji općine Ilidža će biti postavljeno 50 kontejnera za stakleni otpad.

Cilj projekta je unaprijeđenje okvirnih uslova za uspostavljanje ekonomičnog lanca vrijednosti reciklaže stakla na Zapadnom Balkanu. Projekat će pratiti i edukativna kampanja jačanja ekološke svijesti, namijenjena svim građanima i institucijama.



Načelnika Muzura posjetio Mujo efendija Berilo

Načelnika Nermina Muzura 22. januara 2021. danas je posjetio Mujo ef. Berilo, penzionisani imam džamije u Kovačima/Hrasnica.

„Ponosan sam na mlade i čestite ljude iz našeg džemata, čiji sam svjedok odrastanja, a koji su danas postali važni ljudi, ne samo u našoj lokalnoj zajednici nego i šire. Trudite se da poboljšate životne prilike u našoj općini i podržavajte jedni druge u onome što je dobro. Načelniku želim puno sreće i uspjeha u radu“, rekao je efendija Berilo.

Načelnik Muzur zahvalio se efendiji Berilu na posjeti i na čestitkama, te obećao da će se truditi da u svom mandatu i radu opravda povjerenje građana Općine Ilidža.



Posjeta mališana iz vrtića “Sretno djetinstvo” i “Lužani”

Djeca iz vrtića “Sretno djetinstvo” i “Lužani” u pratnji svojih odgajatelja posjetili su načelnika Općine Ilidža, Nermina Muzura, kako bi mu uz pjesmu i stihove čestitali Dan nezavisnosti Bosne i Hercegovine koji se obilježava 1. marta. Nakon što su izrecitovali i otpjevali pjesme u čast domovine, načelniku Muzuru su uručili svoje poklone i crteže.

“Ovo su mi sigurno najdraže posjete koje sam imao do sada. Izuzetno mi je drago što ste posjetili Općinu Ilidža i uvijek ste dobrodošli. Sretan vam Dan nezavisnosti Bosne i Hercegovine i čuvajte svoju domovinu“, rekao je, između ostalog, načelnik Muzur.





Prijatelji iz Crne Gore u posjeti Općini

Načelnik Općine Ilidža Nermin Muzur ugostio je Seada Šahmana, savjetnika u Ministarstvu finansija i socijalnog staranja u Crnoj Gori.

Jedna od tema razgovora bila je moguća saradnja sa lokalnim zajednicama u Crnoj Gori i mogućnost zajedničkog pristupa različitim fondovima i izvorima sredstava za realizaciju projekata i drugih aktivnosti.

Načelnik Muzur se zahvalio na posjeti i istakao da je Općina Ilidža otvorena za saradnju koja će pridonijeti razvoju i unapređenju ove lokalne zajednice, ali i da je spremna pružiti podršku i drugim lokalnim zajednicama u razmjeni znanja, iskustva, kvalitetnih projekata i rješenja.

Inače, savjetnik u Ministarstvu finansija i socijalnog staranja u Crnoj Gori Sead Šahman, svoje je znanje i zvanje stekao na Univerzitetu u Sarajevu, a potom se vratio u Crnu Goru i tamo obavlja niz društveno-političkih funkcija.

Dvorište vrtića “Radost” uljepšano crtežima omiljenih likova

Vrtić “Radost” u Hrasnici koji radi u okviru JU “Djeca Sarajeva” nedavno je obnovljen i cijeli objekat je sad u funkciji. Pored vrtićke zgrade ovaj objekat raspolaže sa najvećim dvorištem u sklopu JU koje treba dodatno uljepšati i prilagoditi djeci. Na inicijativu osoblja vrtića pokrenuto je ukrašavanje zidnih površina u okviru dvorišta. Na taj poziv odazvala se grupa talentovanih momaka iz grupe pod nazivom “Šarena laža” i koji su svojom kreativnošću uljepšali zidne površine likovima iz crtanih filmova poznatih djeci. Sve je praćeno sponzorstvom Grawe osiguranja koje je obezbjedilo novac za kupovinu potrebnog materijala. Momci su pokazali veliki trud i zalaganje i ostavili trajni doprinos u uljepšavanju eksterijera vrtića. Zato zaslužuju jedno veliko hvala od lokalne zajednice i svi ju nas i podstičaj za daljnji rad.



Akcija dobrovoljnog darivanja krvi

Budući da je dobrovoljno davanje krvi važno za osiguravanje nužnih zaliha krvi i dobro funkcionisanje zdravstvene zaštite od neizmjerne je važnosti kontinuirano provođenje akcija dobrovoljnog davanja krvi i tokom pandemije koronavirusa (COVID-19).

U organizaciji Crvenog križa Općine Ilidža u Maloj Aleji održana je akcija dobrovoljnog darivanja krvi. Kapi koje život znače uspješno je darovalo 25 davaoca. Za sve davaoce su pripremljeni prigodni pokloni.



Općina Ilidža druga u FBiH po prometu

Prema podacima Poreske uprave Federacije Bosne i Hercegovine (PUFBiH), na prostoru općine Ilidža u prvih 11 mjeseci ove godine evidentiran je ukupni promet preko fiskalnih uređaja 2.720.057.308,83 KM. Po tom ekonomskom pokazatelju Općina Ilidža je druga u Federaciji u kojoj je evidentiran ovakav promet preko fiskalnih uređaja. Ti podatci govore kako je Općina Ilidža vrlo važan ekonomski prostor u FBiH.



ABA 2 liga na Ilidži

U periodu od 01.03.-07.03.2021. godine na području općine Ilidža održat će se treći balon ABA 2 lige.

Tim povodom, na press konferenciji održanoj 28.02.2021.godine, obratili su se direktor ABA lige gospodin Milija Vojinović, načelnik Općine Ilidža Nermin Muzur, te predsjednik Omladinskog košarkaškog kluba Spars gospodin Nihad Selimović.

„Hoću da vjerujem da je ovaj turnir na Ilidži početak Evropskog puta i povratak na Evropske staze kada je u pitanju klupska košarka u BiH, a time prvenstveno mislim na Kanton Sarajevo i Opštinu Ilidža. Izuzetno je veliko zadovoljstvo i čast što se ovaj balon ABA 2 lige održava na Ilidži, to je velika stvar za naše mlade sportiste. Ono što je važno jeste poruka koju šaljemo, a to je da je naša općina uvijek bila sportska općina. Općina Ilidža ima olimpijsku medalju i medalju Evropskog prvaka, a nju nam je donio naš rahmetli Sabit Hadžić po kojem se i zove sportska dvorana na Ilidži i upravo će ekipe ABA 2 lige trenirati u toj dvorani. Na poziv Nihada Selimovića predsjednika OKK Spars ekspresno smo uradili sve što je bilo u našoj mogućnosti da zajedno sa OKK Spars organizujemo ovaj turnir na Ilidži. Svim učesnicima kako trenerima i igračima, upravama klubova, svima onima koji su dali doprinos i naravno rukovodstvu ABA 2 lige želimo puno sreće“, istakao je načelnik Muzur.